



**Konstatujući sa zadovoljstvom** da ocjena supervizora, koju je pozdravilo Vijeće za implementaciju mira, da institucije Brčko distrikta, kao cjelina, funkcionišu efikasno i po svemu sudeći trajno, predstavlja potvrdu da su institucije Brčkog u najvećoj mjeri ispunile svoje obaveze u skladu s odlukama Arbitražnog tribunala;

**Dijeleći zabrinutost** supervizora i Vijeća za implementaciju mira da je za ispunjenje uslova koji proističu iz odluka Tribunala i/ili sporazuma zaključenih s entitetima 2000. i 2001. godine, a koji se odnose na promjenu entitetskog državljanstva stanovnika Distrikta, izmirenje uzajamnih dugovanja po osnovu obaveza prema korisnicima zdravstvene zaštite i penzionerima i na odredbe u vezi s pravnim osnovom za snabdijevanje Distrikta električnom energijom, još uvijek potrebno da entiteti i vlasti Bosne i Hercegovine preduzmu određene radnje;

**Podsjećajući** da se stavom 1 Aneksa Konačne odluke od 18. augusta 1999. godine koju je donio Arbitražni tribunal za spor oko međuentitetske linije razgraničenja na području Brčkog nalaže uspostavljanje «mehanizma kojim bi se svakom stanovniku Distrikta dozvolilo da promijeni entitetsko državljanstvo...» i da Brčko distrikt donese svoj Zakon o izboru entitetskog državljanstva za stanovnike Brčko distrikta BiH (Službeni glasnik Brčko distrikta BiH, br. 3/04 i 40/04) kojim se predviđa takva mogućnost u skladu sa državnim i entitetskim zakonima, ali da takva mogućnost ne postoji zbog nepostojanja zakona kojim se reguliše sprovođenje;

**Nadalje podsjećajući** da su 25. septembra 2001. godine Brčko distrikt i entitetske vlade potpisali Sporazum o implementaciji obaveza iz Konačne arbitražne odluke za Brčko koje se odnose na snabdijevanje električnom energijom, te da je Predsjedništvo BiH kasnije ratifikovalo Ugovor o uspostavi energetske zajednice u jugoistočnoj Evropi od 27. jula 2006. godine, te da se Sporazumom nalaže usklađivanje s pravnim tekovinama Evropske unije (*acquis communautaire*) u oblasti energije, uključujući Direktivu 2003/54/EC Evropskog parlamenta i Vijeća o zajedničkim pravilima unutarnjeg tržišta električne energije, ali da Distrikt nije uključen ni u jedan takav regulatorni okvir u Bosni i Hercegovini;

**Izražavajući zabrinutost** zbog toga što razgovori o ovim pitanjima traju nekoliko godina, ali nisu doveli do bilo kakvih konkretnih rezultata;

**Izražavajući podršku** za nastojanja prethodnog i sadašnjeg gradonačelnika Brčkog na otpočinjanju razgovora o ovim pitanjima sa vladama oba entiteta;

**Ohrabreni** time što je 30. juna 2009. godine Vijeće za implementaciju mira pozvalo entitete i državu da najkasnije do 15. septembra 2009. godine riješe međusobna dugovanja, omoguće promjenu entitetskog državljanstva za stanovnike Brčkog, regulišu pitanja snabdijevanja Distrikta električnom energijom i udjela Brčkog u zlatu i drugim prihodima iz sredstava SFRJ.

Na osnovu člana 22 (2) (d) Statuta Brčko distrikta BiH i člana 64 (4) Poslovnika Skupštine Brčko distrikta, Skupština Brčko distrikta BiH, na 9. redovnoj sjednici održanoj 9. jula 2009. godine, usvaja

## **REZOLUCIJU**

Skupština Brčko distrikta jednoglasno apeluje na Vijeće ministara BiH, Parlamentarnu skupštinu BiH i vlade Federacije BiH i Republike Srpske i njihove zakonodavne organe da nastave da saraduju sa vlastima Brčko distrikta BiH na rješavanju četiri pitanja koja je utvrdilo Vijeće za implementaciju mira na taj način što će postići dogovor o pravnim aktima i zakonima ili ih dopuniti i izmijeniti, što je neophodno kako bi mogli da budu ispunjeni uslovi na osnovu kojih supervizor može konačno izvijestiti Arbitražni tribunal o ispunjenju Konačne odluke i na osnovu kojih će Vijeću za implementaciju mira biti omogućeno da donese odluku o okončanju režima supervizije u Brčko distriktu BiH.

Broj: 01-02-95/09  
Brčko, 9. jula 2009. godine

**PREDSJEDNIK**  
**SKUPŠTINE BRČKO DISTRIKTA BiH**

**Mirsad Đapo, dipl. pravnik**

Dostavljeno:

- 1) Predsjedniku
- 2) Dopredsjedniku
- 3) Gradonačelniku
- 4) OHR-u Brčko
- 5) Parlamentarnoj skupštini BiH
- 6) Vijeću ministara BiH
- 7) Parlamentu Federacije BiH
- 8) Skupštini Republike Srpske
- 9) Vladi Federacije BiH
- 10) Vladi Republike Srpske
- 11) Arhivi